

Was merr su babbeld

Hallo, isch bin widder doo!
Dabb merr nitt ins Nasse. Hosde alles?
Nodierlisch.
ENN Aachebligg, isch bin gleich ferrdisch.
Isch zieh schunn emol moin Jack aus.
Jetzt dusde merr doch ins Nasse dabbe.
Was mussden aach allsfot butze.
Weil du su enn Dreck mache dust.
Immer isch.
Su, ferrdisch. Loss mich emol gugge.
Doo, drei Dudde.
Dich konn merr schicke!
Gelle.
Naa, ewe nitt.
Du host doch grad gesaad ...
Dich konn merr schicke, ja.
No also.
Waaßde nitt, was dess heeßt?
Naa.
Dass merr dich ewe nitt schicke konn.
Ei warum donn nitt?
Weilde die Hälft vergesse host.
Awwer drei Sache habb isch doch.
Awwer vier Sache sollsde holle.
Dess iss doch nitt die Hälft.
Dess seet merr doch su.
Awwer drei vunn vier iss ewe nitt die Hälft.
Gut. Also hosde oo Sach vergesse.
Was sollen isch vergesse hawwe?
Finf Pund festkochende Kadoffele.
Die habb ich nitt vergesse, die haddese nitt.
Dess gibt's doch nitt.
Die hadde Kadoffele, awwer ungekochte.
Wie, ungekochte?
Ei ja, ungekochte, kochende haddese nitt.
Nooch was hosden gefroochd?
Obbse kochende Kadoffele hawwe.
Doch koo kochende, festkochende!
Die haddese erst recht nitt.
Ess nächsde Mol gieh isch uff de Markt.
Du kriehst aach koo kochende Kadoffele.
Festkochende bleiwe doch beim Koche fest.
Unn wer kocht die?
Ei isch, wer donn sunnst
Warum hosden dess nitt gleich gesaad?

Reesch mich nitt uff.
Was issen heit eischendlisch los mett derr?
Was sollen los soi?
Du dust dich nitt rischdisch ausdrigge.
Also wie?
Saach liewer: Dich konn merr nitt schicke.
Unn weider?
Du host oo vunn vier Sache nitt debei.
Unn was noch?
Holl Kadoffele, die beim Koche fest bleiwe.
Muss dess soi?
Ja. Waaßde, dess gieht joo nitt nor dir su.
Was?
Ei ebbes ze saache unn onnersd ze moone.
Iss dess bei onnern aach su?
Ei gugg doch emol in die Zeidung.
Was stiehden droi?
Ei dess meddem Unwort des Jahres.
Ach ja, de Gutmensch.
Doo iss aach ebbes onnersders gemoond.
Ja, merr deet saache, dess iss e Lob.
Naa, dess isses nitt. Meddem Gutmensch
werrd nitt enn Mensch gemoond, der gut iss,
naa, mett dem Wort dut merr iwver diejeni-
sche schenne, die sich um onnern Leit kim-
mern unn die dessdeweесche als e bissi
weltfremd verlacht werrn, also die merr bes-
ser – so moone die, die dess Wort gebrau-
che – als blauäuschisch, also e bissi
dümmlisch-naiv bezeichnete sollt.

Eiern Honnes